

IZILILO

1

2

3

4

5

ISAPHLUKO 1

Yoo! Uhleli wodwa, umzi obantu baye bebaninzi; Obe umkhulu ezintlangeni Usuke waba njengomhlolokazi; umthethelikazi emazweni Usuke waba ngofakwa uviko.

² Ulila elilile ebusuku, iinyembezi zakhe zisezidleleni zakhe; Akanamthuthuzeli kuzo zonke izithandane zakhe; Onke amakholwane akhe amnenezelele, Aba lutshaba kuye.

³ UYuda uye ekuthinjweni, ephuma ezintsizini nasezinkonzweni ezininzi; Yena uhleli ezintlangeni, akafumani kuphumla; Bonke abamsukelayo bamfikele ezingxingongweni.

⁴ Iindlela zaseZiyon zenza isijwili, ngokungabikho kwabaya emithendelekweni; Onke amasango ayo akanamntu, ababingeleli bayo bayancwina; lintombi zayo zinosizi, yona ke kukrakra kuyo.

⁵ Ababandezeli bayo basuka bayintloko; iintshaba zayo zinobunqobo; Ngokuba uYehova uyenze yanosizi ngenxa yokreko lwayo oluninzi; Abantwana bayo bemkile, bathinjiwe, baqhutywa ngumbandezeli.

⁶ Buphumile entombini enguZiyon bonke ubungangamsha bayo; Abathetheli bayo baba njengamaxhama angafumani dlelo, Ahamba engenamandla phambi komsukeli.

⁷ IYerusalem iyazikhumbula, ngemini yeentsizi zayo neyokudinga kwayo, Zonke izinto zayo ezinqwenelekayo ebinazo kwakwiimini zamandulo, Ekuweni kwabantu bayo esandleni sombandezeli, ingenamncedi; Ababandezeli bayo bayibona, bakuhleka ukucinywa kwayo.

⁸ IYerusalem asikuko nokuba yonile yona; ngenxa yoko yaba lubhorha; Bonke ababeyizukisa bayayicukuceza, ngokuba babone ubuze bayo; Nayo ngokwayo iyancwina, ibuye umva.

⁹ Ubunqambi bayo busezingutyeni zayo ezirhuqayo, ayilikhumbulelanga ikamva layo; Yehla ke ngokubalulekileyo; ayinamthuthuzeli; Ithi, Zikhangele, Yehova, iintsizi zam; ngokuba utshaba luzikhulisile.

¹⁰ Umbandezeli usolule isandla sakhe phezu kwezinto zayo zonke ezinqwenelekayo; Kuba ibona iintlanga zingene engcweleni yayo, Owawuwise umthetho wena, ukuba zingangeni ebandleni lakho.

¹¹ Bonke abantu bayo bayancwina, befuna isonka; Barhole izinto zabo ezinqwenelekayo ngenxa yesonka, ukuze bawubuyise umphefumlo; Bona, Yehova, ukhangele, ukuba ndisuke ndacukucezeka.

¹² Akunto na oku kuni nonke, nina nidlula ngendlela? Bhekani nibone, ukuba kukho na umvandedwa onjengomvandedwa wam, endiwenziweyo, Athe uYehova wandenza lusizi ngemini yokuvutha komsindo wakhe.

¹³ Engaphezulu, uthume umlilo emathanjeni am, wawanyathela; Uzanekela umnatha

iinyawo zam, wandibuyisa umva; Undenze inxuwa, yonke imini ndityhafile.

14 Idyokhwe yezikreko zam ibotshwe sisandla sakhe; Zibhijelene, zenyuka zaba semqaleni wam, zawakhubekisa amandla am; INkosi yam indinikele ezandleni zabo ndingenakumisa kubo.

15 INkosi yam izitshitshisile zonke iimbilasane zam eziphakathi kwam; Indimemele umthendeleko, ukuba yaphule amadodana am. INkosi yam ixovule inkazana enguYuda, ngokungathi kusesixovulweni sewayini.

16 Ngenxa yezo zinto ndiyalila; iliso lam, iliso lam lihla amanzi, Ngokuba ekude kum umthuthuzeli, umbuyisi womphefumlo wam; Baziimpanza abantwana bam, ngokuba utshaba lwam lundoyisile.

17 IZiyon iyazolula izandla zayo, ayinamthuthuzeli; UYehova ubawisele umthetho ngoYakobhi, ukuba ababandezeli bakhe bamngqonge: IYerusalem iyinto elubhorha phakathi kwabo.

18 Ulilungisa uYehova; ngokuba bendiphikise umlomo wakhe. Khanive, nonke zizwe, niwubone umvandedwa wam; Umthinjana wam namadodana am emke nokuthinjwa.

19 Ndibize izithandane zam, zandikhohlisa zona; Ababingeleli bam, namadoda amakhulu akwam, aphume umphefumlo phakathi komzi, Xa abezifunela ukudla, ukuba abuyise imiphefumlo yawo.

20 Khangela, Yehova, ngokuba ndibandezelekile; izibilini zam ziyabila; Intliziyo yam iphendukile phakathi kwam; ngokuba ndasuka ndaba ziinkani kuphela; Ngaphandle ikrele landihlutha abantwana, ngaphakathi kwakukufa kodwa.

21 Bandivile ukuba ndiyancwina; ndathi, Andinamthuthuzeli; Zonke iintshaba zam zibuvile ububi bam; zinemihlali, ngokuba oko kwenziwe nguwe. Uyayizisa imini oyimemileyo, ziya kuba njengam ke.

22 Mabufike phambi kwakho bonke ububi bazo, Uziphathe njengoko wandiphatha ngako ngenxa yezikreko zam zonke; Ngokuba kuninzi ukuncwina kwam, nentliziyo yam ityhafile.

ISAHLUKO 2

Yoo! Itheni na iNkosi yam ukuyisibekela kangaka ngomsindo wayo intombi enguZiyon? Isikhuphile ezulwini, yasikahlela ehlabathini, isihombo sikaSirayeli, Ayasikhumbula isihlalo seenyawo zayo ngemini yomsindo wayo.

2 INkosi yam iwaginyile, ayawaconganga, onke amakriwa akwaYakobi; Izigungxule ngokuphuphuma komsindo wayo iinqaba ezinkulu zentombi enguYuda; Yazizisa emhlabeni; Ibungcolisile ubukumkani nabathetheli babo.

3 Izixakazile ngokuvutha komsindo wayo zonke iimpondo zikaSirayeli; Isibuyise umva isandla sayo sokunene ebusweni botshaba; Yatshisa kwaYakobi njengomlilo olenyayo, odlayo ngenxa zonke.

4 Isityedile isaphetha sayo njengotshaba; imise isandla sayo sokunene, saxelisa esombandezeli, Yazibulala zonke izinto ezinqwenelekayo emehlweni; Ententeni yentombi enguZiyon, ibuphalazile ubushushu bayo njengomlilo.

5 INkosi yam isuke yaba njengotshaba; imiginyile uSirayeli, Iziginyile zonke iingxande zayo ezinde, izonakalisile iinqaba zayo ezinkulu; Yandisa entombini enguYuda uncwino nokukhala.

6 Iyichithile indawo yayo ebiyiweyo njengomyezo; Iyitshabalalisile indawo yayo yentlangano; UYehova wenze walityalwa eZiyon umthendeleko nesabatha; Wabagiba ekubhavamuni komsindo wakhe ukumkani nombingeleli.

- ⁷ INkosi yam isihlambele isibingelelo sayo, ithe nethe kuyo ingcwele yayo, Izivingcelele esandleni sotshaba iindonga zeengxande zayo ezinde; Baxokozela endlwini kaYehova njengemini yomthendeleko.
- ⁸ UYehova ucinge ukonakalisa udonga lwentombi enguZiyon; Wolule ulutya lokulinganisela, akasibuyisa isandla sakhe ekuginyeni; Wenza ungqameko lomsele lwaba nesijwili, kwanodonga; zithokombisile kunye ezo zinto.
- ⁹ Amasango ayo atshonile emhlabeni; uyitshabalalisile, uyaphule imivalo yayo; Ukumkani wayo nabathetheli bayo basezintlangeni, akukho myalelo; Abaprofeti bayo abafumani mbono kuYehova.
- ¹⁰ Ahleli emhlabeni ethe cwaka amadoda amakhulu entombi enguZiyon; Azigalele ngomhlaba entloko, abhinqe ezirhwexayo; Uzithobele emhlabeni iintloko zawo umthinjana waseYerusalem.
- ¹¹ Amehlo am aphela ziinyembezi, ziyabila izibilini zam, Isibindi sam siphalalele emhlabeni, ngenxa yokwaphuka kwentombi yabantu bakowethu, Ngokutyhafa kwabantwana, nabasemabeleni, ezitratweni zomzi.
- ¹² Bamana ukuthi koonina, Iphi na ingqolowa newayini? Ekutyhafeni kwabo njengabangxwelerhiweyo ezitratweni zomzi, Ekuziphalazeni kwemiphefumlo yabo esifubeni sonina.
- ¹³ Ndikungqinele, ngantoni na? Ndikufanekise nantoni na, ntombi yaseYerusalem? Ndikulinganise nantoni na, ukuze ndikuthuthuzele, ntombindini iyintombi, inguZiyon? Ngokuba kukhulu ngangolwandle ukwaphuka kwakho; ngubani na onokukuphilisa?
- ¹⁴ Abaprofeti bakho bakubonele imibono yento engento nejavujavu; Ababutyhila ubugwenxa bakho, ukuba kubuyiswe ukuthinjwa kwakho; Bakubonele imibono ezizihlabo ezingezizo, nezokugxothwa.
- ¹⁵ Babetha izandla ngawe bonke abadlula ngendlela; Benza umsondlo, bahlunguzele iintloko ngentombi enguYerusalem, besithi, Ngulo mzi na, lo kuthiwa kuphela kwenzwakazi, yimihlali yehlabathi lonke?
- ¹⁶ Zonke iintshaba zakho zikwakhamisela umlomo; Zenza umsondlo, zitshixizela amazinyo; zithi, Siyiginyile; Inene, yiyo le imini ebe siyithembile; siyifumene, siyibonile.
- ¹⁷ Ukwenzile uYehova abekunkqangiyele; Ulizalisile ilizwi lakhe, abeliwisele umthetho kususela kwiimini zamandulo; Ugungxule, akaconga; Wenze lwakuvuyelela utshaba lwakho, Uphakamise uphondo lwababandezeli bakho.
- ¹⁸ Intliziyo yabo ikhala eNkosini yam; Ludonga lwentombi enguZiyon, mazihle iinyembezi njengomlambo imini nobusuku; Musa ukuyeka, malungaphezi ukhozo lweliso lakho.
- ¹⁹ Vuka, uhlahlambe ebusuku, ekuqalekeni kwemilindo; Yiphalaze njengamanzi intliziyo yakho ebusweni beNkosi; Ziphakamisele kuyo izandla zakho, ngenxa yomphefumlo wabantwana bakho, Abatyhafileyo kukulamba ekujikeni kwezitrato zonke.
- ²⁰ Bona, Yehova, ukhangele, ngubani na lo wenjenje ukumphatha kakubi? Abafazi bangadla isiqhamo somzimba wabo na? Badle abantwana ababathantamisayo na? Angabulawelwa engcweleni yeNkosi na umbingeleli nomprofeti?
- ²¹ Balele emhlabeni phandle oyinkwenkwe noyindoda enkulu; Umthinjana wam namadodana am awile likrele; Ubulele ngemini yomsindo wakho, usikile, akwaconga.
- ²² Ukumemile ngokwemini yomthendeleko ukunxunguphala kwam ngeenxa zonke, Akwabakho usindayo, usalayo, ngemini yomsindo kaYehova. Endibathantamisileyo ndabakhulisa, utshaba lwam lubagqibele.

Ndim indoda ebone iintsizi, ngentonga yokuphuphuma komsindo wakhe.

² Undikhokele wandihambisa ebumnyameni, akwaba sekukhanyeni.

³ Ubuye wasiguqulela kum ndedwa isandla sakho imini yonke.

⁴ Uyonakalisile inyama yam nolusu lwam; uwaphule amathambo am.

⁵ Undakhele wandirhaqa ngenyongo nendiniso.

⁶ Undibele ezindaweni ezimnyama, njengabafe ngonaphakade.

⁷ Undibiyele ngeenxa zonke, andinakuphuma; uwenze aba nzima amakhamandela am obhedu.

⁸ Noko ndikhalayo, ndizibikayo, uyawuvingcela umthandazo wam.

⁹ Uzibiyele iindlela zam ngamatye aqingqiweyo, uzenze goso iingqushu zam.

¹⁰ Kum uyibhere elalelayo, uyingonyama esezintsithelweni.

¹¹ Uzityekisile iindlela zam, wandidlavula; undenze inxuwa.

¹² Usigobile isaphetha sakhe, wandimisa ndaba yitekeni yotolo lwakhe.

¹³ Uzise ezintsweni zam iintolo zomphongolo wakhe.

¹⁴ Ndisuke ndayintlekisa kubantu bonke bakowethu; ndiyingoma yabo imini yonke.

¹⁵ Undihluthise ngeento ezikrakra, wandiseza ndahlutha umhlonyane.

¹⁶ Uwaphule ngohlalu amazinyo am; undixinzelele phantsi eluthuthwini.

¹⁷ Uwuhlambile umphefumlo wam, awaba naluxolo; ndiyilibele into elungileyo.

¹⁸ Ndathi, aphelile amandla am, nokulinda kwam kuYehova.

¹⁹ Zikhumbule iintsizi zam, nokutshutshiswa kwam, umhlonyane nenyongo.

²⁰ Umphefumlo wam uyazikhumbula unangoku ezo zinto, usibekekile kum.

²¹ Oko ndikunyamekele ngentliziyo: ngenxa yoko ndilindile.

²² Kungeenceba zikaYehova le nto singagqityelwanga, ngokuba azipheli iimfesane zakhe.

²³ Zintsha imiso ngemiso; kukhulu ukuthembeka kwakhe.

²⁴ Isabelo sam nguYehova, utsho umphefumlo wam; ngenxa yoko ndilindele kuye.

²⁵ UYehova ulungile kwabathembele kuye, kumphefumlo omquqelayo.

²⁶ Kulungile ukuba umntu alulindele, ethe cwaka, usindiso lukaYehova.

²⁷ Kuyilungele indoda ukuba iyithwale idyokhwe kwasebutsheni bayo.

²⁸ Mayihlale yodwa ithe cwaka, xa iyithwalisiweyo.

²⁹ Mayiwubeke eluthulini umlomo wayo; kungabakho ithemba mhlawumbi.

³⁰ Mayisinikele isidlele sayo koyibethayo; mayihluthe yingcikivo.

³¹ Ngokuba iNkosi yam ayiyi kumhlamba umntu ngonaphakade,

³² Ngokuba naxa imhlisele usizi, noko yoba nemfesane ngokobuninzi benceba yayo.

³³ Ngokuba ayibacinezeli ngokuphuma entliziyweni yayo, ibenze babe nosizi oonyana babantu.

³⁴ Ekutyunyuzweni kwababanjweyo bonke behlabathi phantsi kweenyawo;

³⁵ Ekulijikeni ityala lomfo phambi kobuso bOsenyangweni;

³⁶ Ekuphenulweni komntu ekubambaneni kwakhe nomnye: iNkosi yam ayiboni na?

³⁷ Ngubani na okhe wathetha, kwenzeka, iNkosi yam ingawisanga mthetho?

³⁸ Akuphumi okubi nokulungileyo emlonyeni wOsenyangweni na?

³⁹ Yini na ukuba umntu akhalaze ephilile? Umfo makakhalaze ngenxa yezono zakhe.

⁴⁰ Masiziphengulule iindlela zethu, sizigocagoce, sibuyele kuYehova.

⁴¹ Masizinyuse iintliziyo zethu kunye nezandla zethu, sizise kuThixo emazulwini.

- ⁴² Thina sikreqile saba neenkani; wena akuxolelanga.
- ⁴³ Uzigqubuthela ngomsindo, wasisukela; ubulele akwaconga.
- ⁴⁴ Uzigqubuthela ngelifu, ukuze ungaphumeli umthandazo wethu.
- ⁴⁵ Usenze inkunkuma, imvuthuluka esazulwini sezizwe.
- ⁴⁶ Zisakhamisele umlomo wazo zonke iintshaba zethu.
- ⁴⁷ Kokwethu ukunkwantya, nomgongxo, nesibatha, nokutshabalala, nokwaphuka.
- ⁴⁸ Iliso lam lihla imijelo yamanzi, ngenxa yokwaphuka kwentombi yabantu bakowethu.
- ⁴⁹ Iliso lam liyatyityizela, aliyeki, alinqamki,
- ⁵⁰ Ade aqondele abone uYehova, esemazulwini.
- ⁵¹ Iliso lam liyawubulala umphefumlo wam, ngenxa yeentombi zonke zomzi wakowethu.
- ⁵² Zindizingele zandizingela njengentaka iintshaba zam ngelize.
- ⁵³ Zibubhangisile ubomi bam ngokundeyelisela emhadini, zandigibisela ngamatye.
- ⁵⁴ Amanzi ahambe phezu kwentloko yam, ndathi, Ndinganyulwe.
- ⁵⁵ Ndingule igama lakho, Yehova, kongaphantsi umhadi.
- ⁵⁶ Izwi lam waliva; musa ukuyifihla indlebe yakho ekubefuzeni kwam, ekuzibikeni kwam.
- ⁵⁷ Wasondela ngemini yokukunqula kwam, wathi, Musa ukoyika.
- ⁵⁸ Uwathethile amatyala omphefumlo wam, Nkosi yam; ubukhulule ubomi bam ngokubumisela.
- ⁵⁹ Ukubonile, Yehova, ukuphenulwa kwam; ligwebe ityala lam.
- ⁶⁰ Uyibonile yonke impindezelo yabo, uzivile zonke iingcinga zabo ngam.
- ⁶¹ Ukuvile ukungcikiva kwabo, Yehova, uzivile zonke iingcinga zabo ngam,
- ⁶² Umlomo wabo basukela phezulu kum, nezicamango zabo ngam yonke imini.
- ⁶³ Ukuhlala kwabo nokusuka kwabo kubheke; ndiyingoma yabo.
- ⁶⁴ Babuyisele imbuyekezo, Yehova, ngokwezenzo zezandla zabo.
- ⁶⁵ Banike ubumfama bentliziyo; intshwabulo yakho mayibe kubo.
- ⁶⁶ Basukele ngomsindo, ubatshabalalise, bangabikho phantsi kwamazulu kaYehova.

ISAHLUKO 4

Yoo! Isuke igolide yaba mncumevu; isuke ecikizekileyo, elungileyo, yaba yeyimbi; Asuke aphalazwa amatye engcwele ekujikeni kwezitrato zonke.

- ² AbeZiyon abanqabileyo, abamelwe yigolide engcwengiweyo, Yoo! Babalelwa ekubeni yimiphanda yodongwe, umsebenzi wezandla zombumbi.
- ³ Kanti neempungutye ziyalirhola ibele, zanyise amathole azo; Ke yona intombi yabantu bakowethu isuke yaba sisijorha, njengenciniba entlango.
- ⁴ Ulwimi losebeleni lunamathela ekhuhlangubeni lakhe linxano; Abantwana bacela isonka, akukho ubaphulelayo.
- ⁵ Ababesidla ubuncwane baphanzile ezitratweni; Ababephathwa ngeengubo ezibomvu bawola amazala.
- ⁶ Bukhulile ubugwenxa bentombi yakowethu ngaphezu kwesono seSodom, Yona yabhukuqwayo ngephanyazo, kungasiwanga sandla kuyo.
- ⁷ Babeqaqambile ababalulekileyo bayo ngaphezu kwekhephu; baye bemhlophe ngaphezu kwamasi; Babeyinqombela imizimba ngaphezu kwekorale, isibili sabo besinjengesafire;
- ⁸ Imbonakalo yabo imnyama ngaphezu kocolothi; Abanakaneki ezitratweni; ulusu lwabo

lutshele emathanjeni abo; lomile, lwanjengokhuni.

⁹ Baneyhweba ababulewe ngekrele kunababulewe yindlala, Bona baphelayo ngokubulawa kukungabikho kweziqhamo zamasimi.

¹⁰ Izandla zabafazi abanemfesane zipheke abantwanana babo, Baba kukudla kwabo ekwaphukeni kwentombi yabantu bakowethu.

¹¹ Ubuphelelisile ubushushu bakhe uYehova, ukuphalazile ukuvutha komsindo wakhe; Wafaka umlilo eZiyon, wazitshisa iziseko zayo.

¹² Bebengenakukholwa ookumkani behlabathi, nabemi bonke belimiweyo, Ukuba ubengangenayo umbandezeli notshaba emasangweni aseYerusalem.

¹³ Kungenxa yezono zabaprofeti bayo, nobugwenxa bababingeleli bayo, Abaphalaze igazi lamalungisa phakathi kwayo.

¹⁴ Baphamzela beziimfama ezitratweni, bedyobhekile ligazi, Bada abantu ababa nakuchukumisa nezambatho zabo.

¹⁵ Sukani, nantso inqambi! Kwatshiwo ukumenyezwa kubo. Sukani, sukani, musani ukuphatha! Bakusaba, baphamzela nalapho, kwathiwa phakathi kweentlanga, Mabangaphindi baphambukele khona.

¹⁶ Ubuso bukaYehova bubachithachithile, akasayi kubabheka; Ubuso bababingeleli ababubhekanga, amadoda amakhulu abawababalanga.

¹⁷ Thina, amehlo ethu ayaphela, ekhangele uncendo olungamampunge; Ekuboniseleni kwethu sibonisela uhlanga olungayi kuisindisa.

¹⁸ Bazingela amanyathela ethu, ukuze singabi nakuhamba ezitratweni zethu; Kusondele ukuphela kwethu, izalisekile imihla yethu; ewe, kufikile ukuphela kwethu.

¹⁹ Abasisukelayo banamendu ngaphezu kwamaxhalanga asezulwini; Basisukela ezintabeni ngokushushu, basilalela entlango.

²⁰ Umoya wamathatha ethu, umthanjiswa kaYehova, ubanjisiwe emihadini yabo: Lowo besisithi, Siya kuhlala phantsi komthunzi wakhe ezintlangeni.

²¹ Yiba nemihlali uvuye kambe, ntombi yakwaEdom, ihleliyo ezweni lakwaUtse; Iya kudlulela nakuwe indebe; uya kunxila, uzihlube.

²² Bugqityiwe ubugwenxa bakho, ntombi inguZiyon; Akayi kuphinda akufuduse; Uya kubuvela ubugwenxa bakho, ntombi yakwaEdom. Uya kuzityhila izono zakho.

ISAHLUKO 5

Kukhumbule, Yehova, okusihleleyo; Bheka, uyibone ingcikivo yethu.

² Ilifa lethu lisuke lenziwa elabasemzini, Izindlu zethu zalunga kwabolunye uhlanga.

³ Siziinkedama, asinabawo; Oma banjengabahlolokazi.

⁴ Amanzi ethu siwasela ngesilivere; linkuni zethu ziza kuthi ngexabiso.

⁵ Intshutshiso iphezu kwentamo yethu; Sidiniwe, asinakuphumla.

⁶ Isandla sisinika amaYiputa, Nama-Asiriya, ukuba sihluthe sisonka.

⁷ Oobawo bonile, abasekho; Thina sithwele ubugwenxa babo.

⁸ Silawulwa ngabakhonzi; Akukho usiqhiwulayo ezandleni zabo.

⁹ Isonka sethu sisizuka ngomphefumlo wethu usisichenge. Ngenxa yekrele lasentlango.

¹⁰ Ulusu lwethu luyavutha njengeziko Ngenxa yolophu lwendlala.

¹¹ Badlwengule abafazi eZiyon, lintombi emizini yakwaYuda.

¹² Baxhome abathetheli ngezandla; Ubuso bamadoda amakhulu abubekwa.

- 13** Amadodana athwala amatye okusila, Amakhwenkwe akhubeka phantsi kweenkuni.
- 14** Amadoda amakhulu aphezile ukuya esangweni; Amadodana, ekubetheni uhadi.
- 15** Iphelile imihlali yentliziyo yethu, Ukuqamba kwethu kujike kwaba kukumbambazela.
- 16** Siwile isithsaba entlokweni yethu; Yeha ke thina! kuba sonile.
- 17** Ngenxa yoko ityhafile intliziyo yethu; Ngenxa yezo zinto amnyama amehlo ethu;
- 18** Ngenxa yentaba yaseZiyon, kuba ibharhile, Kuhamba iimpungutye phezu kwayo.
- 19** Wena, Yehova, uhleli ngonaphakade; Itrone yakho ikwisizukulwana ngesizukulwana.
- 20** Yini na ukuba usilibale ngonaphakade, Usilahle imihla emide?
- 21** Sibuyisele kuwe, Yehova; sobuya; Hlaziya imihla yethu njengokwamandulo.
- 22** Ungaba usicekise mpela na, Wanoburhalarhume kuthi ngokukhulukazi na?

For other languages please go to **www.wordproject.org**